

***Ilanngussa* O**



INATSISARTUT

Aningaasaqarnermut Aatsitassanullu Naalakkersuisoq

Ulloq: 24. april 2015

J.nr.: 01.31.11-00014

2015-imi aningaasanut inatsisissatut siunnersuut pillugu Aningaasaqarnermut Ataatsimiititaliap allakkatigut akissassatut apeqqutai.

Aningaasaqarnermut Ataatsimiititaliap oqaaseqaatai apeqqutaalu:

2015-imi aningaasanut inatsisissatut siunnersuut pillugu Aningaasaqarnermut Ataatsimiititaliap ilassutitut apeqqutai oqaaseqaataalu matumuuna nassiunneqarput. Ataatsimiititaliap 18. marts 2015-imi apeqqutaanut Naalakkersuisut akissutaannik Aningaasaqarnermut Ataatsimiititaliap misissuina apeqqutitut pingaarnertut tungaviuvoq.

Tassunga atatillugu apeqqutit uku Naalakkersuisunit akissuteqarfigineqarnissaat Aningaasaqarnermut Akileraartarnermullu Ataatsimiititaliamit kissaatigineqarpoq:

Immikkoortut normui taaneqartut ataatsimiititaliap 18. marts apeqqutaanut normuliunneqartut assigaat.

3.4. Immikkoortoq 2, Aningaasaqarnikkut ingerlatsinermi anguniakkat.

Apeqqut a)-mut Naalakkersuisut akissutaanni oqaaseqatigiit siulliit ersernerlulaarsorinarput. Paatsoortoqaqqunagu akissut ersarinnerusumik oqaasertalioqqullugu Naalakkersuisut qinnuigineqarput.

3.6. Immikkoortoq 3, Aningaasaqarnikkut inissisimaneq.

“Kiisalu aalisakkanut pisassiissutit iluarsineqarnerat?” qanoq isumaqartinneqarpa? Pisassiissutit amerliniarneqarpat? Allatut agguanneqarniarpat? Tamannalu suliffissaaleqinerup annikillisarniarneqarneranut qanoq sunniuteqassava?

3.8 Immikkoortoq 3.1, Akiitsoqarnerup nikerarnera.

Mittarfinnik sanaartorerup taarsigassarsinikkut aningaasalersorneqarnissaa Naalakkersuisut ataatsimiititaliap apeqqutaanut b)-mut akissummini isumaliutigigaat ataatsimiititaliamit maluginiarneqarpoq. Aningaasaqarnikkut siuariartornissamut siunissamut takussutissiat Assartuinermmut Isumalioqatigiissitap isumaliutissiissutaani oqaatigineqartut siunissami taarsigassarsinnaanernut taakkununga suli aallaaviuppat imaluunniit aningaasaqarnikkut maanna inissisimaneq pissutigalugu siuariartornissamut naatsorsuutigisat appasinnerutinissaat Naalakkersuisunit pissutissaqarsorineqarpa?

3.9 Immikkoortoq 3.2, Kommunit aningaasaqarnerat.

Kommunip avinneqarnissaanik kommunit arlaata kissaatqarsinnaanera ataatsimiititaliamit isumaliutigineqarsimavoq. Tassunga atatillugu kommunip akiligassai kommunit nutaat marluk akornanni qanoq avinneqartariaqarlutillu avinneqarnissaannik Naalakkersuisut eqqarsaataat paasissutissiissutigineqassasut ataatsimiititaliamit kissaatigineqarpoq?

3.15. Immikkoortoq 5.1, Ineqarnermut tunngasut

Apeqqut d) pillugu. Ataatsimiititaliap apeqqutaanut akissut "naamik"-tut paasineqassava? Akissut itisileqquneqarlunilu erseqqissaqquneqarpoq.

3.16 Immikkoortoq 5.2, Mittarfiit

Naalackersuisut mittarfinnik sanaartornissamut pilersaarutaanni mittarfinnik toqqaanermi suut isiginiarneqassanersut paasissutissiissutigineqassasut ataatsimiititaliamit kissaatigineqarpoq. Qaortumi mittarfiliorsinnaanermi angallanneqarnissamik pisariaqartitsinerup saniatigut isiginiagassat tunngavigineqartussat Naalackersuisut akissutiminni taasaqarfigissagaat ataatsimiititaliamit kissaatigineqarpoq.

3.23 Immikkoortoq 7, Missinginerit nutaat aamma akinik akissarsianillu siumut naatsorsuineq

Namminersorlutik Oqartussani sulisut Kalaallit Nunaannut akileraartussaataasut pillugit naatsorsuineq suliarineqarsinnaava, taamaappallu taamaattup siunissami suliarineqartarissaa Naalackersuisunit kissaatigineqarpa?

5.4 Konto pingaarneq 10.06.27 Suliffissuaqarnermut pilersaarutinut annernut atatillugu arlaannaannulluunniit attuumassuteqanngitsumik paasiniaasussanut aningaasanik tapiissutit
Aningaasaateqarfimmuq qinnuteqarnissami atugassatut maleruagassat maanna oqaasertalersugaanerat aningaasaateqarfimmuq qinnuteqarusuttunut "qunulersitsisinnaasut" Naalackersuisunit isigineqarpat? Tassungaa aamma tunngatillugu maleruagassat tapiissutinik pilersitsinermi siunertarineqartumut anersarineqartumullu naapertuuttumik sunnuteqartutut Naalackersuisunit nalilerneqarpat?

5.7 Konto pingaarneq 12.01.11 Namminersorlutik Oqartussat Københavnimi inissiaataat
Akunnittarfirmuq akunnittarfinnut isumaqatigiissummi ilaasunut sanilliullugu inissiamiinneq qanoq akeqarnerseq paasissutissiissutigineqassasooq ataatsimiititaliamit kissaatigineqarpoq. Inissiamiinneq akikinnerusooq paasinarsissagaluarpat inissiamik atuneq Naalackersuisunit siunissami qanoq siuarsavigineqalersaarnersooq paasissutissiissutigineqassasooq ataatsimiititaliamit kissaatigineqarpoq.

6.7 Konto pingaarneq 20.11.51 Nutarterinerit sunniutaat

Apeqqutip matuma ataani imm. e-p aamma h-p akineqarnissaat ataatsimiititaliamit amigaatigineqarpoq. Taamaattumillu apeqqutinut akissut ataatsimiititaliamit ujartorneqarpoq.

6.10 Konto pingaarneq 20.16.01 Naatsorsueqqissaartarfik

Isumaginninnermut tunngasuni aammalu naligiissarinnermut aqqissuussinnermut atatillugu kisitsisitigut paasissutissat assigiissaakkat pigineqalernissaannut immikkut aningaasaliissuteqarnissaaq pisariaqassava?

6.12 Konto pingaarneq 20.30.07 Boligstøtte, ernianut akilersuutinullu tapiissutit, ilanngaaseereerluni

INI-p ASA-llu akornanni isumaqatigiissuteqartoqarsimaneranik Naalackersuisut paasissutissiinerat ataatsimiititaliamit maluginiarneqarpoq, taamaattorli ineqarnermut tunngasuni pisortat suliassaasa isumagineqarnissaat eqqarsaatigalugu Namminersorlutik Oqartussanik suleqateqarnermi INI-p siunissami inissisimanissaa pillugu Naalackersuisut qanoq anguniaqarnerisut pillugu paasissutissat suli qinnutigineqarlutik.

6.24 Konto pingaarneq 24.11.26 Avaleraasartuunut akitsuut

Assigiinngisitaartumik akitsuusersuisinnaanerup Naalackersuisunit qanoq isumaqarfigineqarnerata erseqqinnerusumik nassuiaatigineqarnissaa ataatsimiititaliamit kissaatigineqarpoq. Kiisalu avaleraasartuut suli ukiuni qassini misileraatitut aalisarneqartussatut naatsorsuutigineqarnersut paasissutissiissutigineqassasoq kissaatigineqarpoq?

8.6 Konto pingaarneq 30.10.45 Meeqqat inuusuttullu immikkut ittumik suliniuteqarfigineqarnerat

Kommunini meeqqanut tunngasumik suliassanik suliarinnittarnerup nukittorsarnissaa pillugu suliniuteqarneq Naalackersuisunit naliliiffigineqarsimanersoq paasissutissiissutigineqassasoq ataatsimiititaliamit kissaatigineqarpoq. Naliliineq taamaattoq pigineqassappat nassiunneqassasoq ataatsimiititaliamit kissaatigineqarpoq.

8.10 Konto pingaarneq 30.12.09 Siusinaartumik pensionisiat

Akissumminni Naalackersuisut allapput "Kommunini immikkoortortat – suliffissarsiuussisarfiit, Piareersarfiit inunnillu isumaginnittoqarfiit akornanni ataqpeqatigiilluni suleqatigiittoqarnissaa pisariaqarpoq suliffissaaleqinerpaat suliffeqalersinniarlugit". "ataqpeqatigiilluni suleqatigiittoqarnissaa"-nik oqarnerminni Naalackersuisut suna eqqarsaatigaat, maannalu taamaattoqanngippat ajornartorsiut qanoq aaqinneqarsinnaasoraat. Piginnaanngorsaaneramik suliassat pisariaqartut amerlassusillit suliniutissanut aggersunut atatillugu kommuninit tamakkiisumik isumagineqarsinnaasutut Naalackersuisunit isumaqarfigineqarpat? Taamaattoqanngitsoq paasinarsissagaluarpat periarfissaq alla suua?

9.2 Konto pingaarneq 34.11.03 Dronning Ingridip Napparsimmavissua

Akissummi allassimavoq immikkut aningaasaliissuteqarnerup kingunerisaanik utaqqisarneq malunnaatilimmik sivikillisimasoq aammalu napparsimasut amerliartornerat maannakkut katsorsaanikkut piginnaassutsimut naleqqutikannersoq. Naalackersuisut akissutaat ima paasineqassava seqquusalertinniartut/siffiaasalertinniartut, isip igalaasartaata isigiarsulersimanageranarut (gråstær) atatillugu suliaritinniartut, ujarattaajartinniartut aammalu siutiminni igalaasaminnik putusoorsimallutik suliaritinniartut utaqqisarnerat siunissami naammagiartumik sivisussuseqartassasoq; inalukkamik kulli kræfteqalersimasutut pasineqartut amerliartornerisa kingunerissagaa suliassa-qarfimmut tassunga maanna immikkut aningaasaliissutaasartut amerlaqataannik immikkut ittumik aningaasaliissuteqartoqanngippat suliassa-qarfimmi tassani utaqqisut amerliartulernerat?

9.5 Konto pingaarneq 34.12.02 Nunatsinni Peqqinnissakkut Ilinniartitaanikkullu suliniutit
Kontomi pingarnermi matumani nuussinerit pillugit skemanngorlugu takussutissiaq nassiunneqassasoq ataatsimiititaliamit qinnutigineqarpoq.

10.16 Konto pingaarneq 40.92.10 Folkehøjskolit

Folkehøjskolit marluusut oqaloqatigineqarnerat suli ingerlasoq, taamaattorli aningaasaqar-nikkut ajornartorsiutit qanoq aaqqiivigineqarsinnaassanersut suli isumaqatigiissutigineqanngitsoq Naalackersuisunit paasissutissiissutigineqarpoq. Qaqugu aaqqiissuteqartoqarnissaa naatsorsuutigineqarnersoq pillugu ilisimatinneqarnissani kiisalu isumaqatigiittoqareerpat inaarutaasumik aaqqiissutaasumik ilisimatinneqarnissani ataatsimiititaliap qinnutigaa.

11.5 Konto pingaarneq 51.03.03 Ineriartortitsinermut aningaasatigut tapersiissutit, nunalerineq

Ataatsimiititaliarsuup kaammattuutaasa ilaat anguniarumaneqartut aammalu immikkoortut suut piviusunngortissallugit ajornartorsiutitaqarsinnaasutut isumaqarfigineqartut akissummi nassuiaatigineqarnissaannik Naalackersuisut ataatsimiititaliamit qinnuigineqarput.

12.3 Konto pingaarneq 64.01.05 Nunaqarfinni isorliunerusunilu inuussutissarsiornermi suliffeqarnermilu ineriartortitsineq

Apeqqut c) pillugu. Kommunit aningaasaleeqataanissaat sooq piumasaqaatigineqarsimanngila? Tamanna aallaaviunnginnami? Tamanna qanoq kinguneqassava? Suliniutinullu assigiinngitsunut kikkut "piginnittunngussappat"?

12.4 Konto pingaarneq 64.10.17 Nunami inuussutissarsiuutinut takornariartitsinermullu tapiissutit

Apeqqut a) pillugu. Tapiissutit pisuni ataasiakkaani tamani qanoq atorneqarnerisut aammalu ungasinnerusoq isigalugu tapiissutit qanoq kinguneqassanersut qanoq annertutigisumik malinnaavigineqartarpat. Suliffeqarfiit tapiissutinik ingerlasut taakku siunissami aningaasaqarnikkut imminnut napatinnerulernissaat Naalakkersuisut anguniagaraat, taamaappallu tamanna qanoq piviusunngortinneqarsinnaassava?

Apeqqut b) pillugu. Ukiuni missingersuusiorfiusuni Neqi A/S-imut missingersuutit 0 kr.-iunerannut suna tunuliaqutaava, tamatumami peqatigisaanik suliffeqarfiup ukiuni aggersuni pisortanit ingerlatsinermut tapiiffigineqarnissaata pinngitsoorneqarsinnaannginnera KNI A/S-imit nalilernerqarnera eqqumaffigeqquneqarmat?

12.6 Konto pingaarneq 64.10.22 Kalaallit Nunaaniit imermik nilannillu avammut tuniniaaneq

Kalaallit Nunaata nilammik imermillu avammut tuniniaanermi ingerlatsisutut ataqqisaasutut inissinnissaanik anguniagaqarneq eqquutsinneqarsinnaaqqullugu suliniutit sorsipaat maanna aallartinneqarsimanersut paasissutissiissutigineqassasoq ataatsimiititaliamit kissaatigineqarpoq.

12.7 Konto pingaarneq 64.10.25 Suliniutit angisuut

Kontomi pingaarnermi uani aluminiumik suliniutip qitiutinneqarnera allanngorlugu suliniutit angisuut allat aamma ilanngunneqarnerat ataatsimiititaliamit malugineqarpoq. Matumani aningaasaliissutit aatsitassarsiornermi suliniutinut angisuunut atatillugu ilaatigut IBA-mik isumaqatigiinniarnernut aammalu inuiaqatigiit aningaasaqarnerannut attuumassuteqartunik isumaginninnermut atorneqartartut Naalakkersuisut akissutaanni allassimavoq. Tassunga atatillugu ataatsimiititaliamit ilimagineqarpoq Isukasiani suliniutip ingerlanneqarneqarnerani piginnittut nutaat aallaqqaataaneerluni IBA-mik isumaqatigiinniarfigineqartariaqasannngitsut.

Tassunga atatillugu ilassutitut ima apeqquteqarnissani ataatsimiititaliap pissutissaqarsoraa.

- a) Kuannersuarni suliniutip inuiaqatigiit aningaasaqarnerannut tunngasortaanik misissuineq qanoq siuarsimatigaa?
- b) Kuannersuarni piginnittut IBA-mik isumaqatigiinniarfigineqalereerpat?
- c) Ukiut pingasut qaangiuppata uranimik avammut niuerutiginninnissamut nunat tamaalat piumasaqaataat nunatsinnit eqquutsinneqarsimassanersut aammalu Kuannersuarni suliniut ingerlanneqarnissaminut piareersimassanersooq Naalakkersuisunit paasissutissiissutigeqquneqarpoq. Tassunga atatillugu suliap taassuma ingerlanneqarnissaanut pilersaarut nassiunneqaaqqullugu ataatsimiititaliamit qinnutigineqarpoq.
- d) Citronenfjordenimi suliniutip inuiaqatigiit aningaasaqarnerannut tunngasortaanik misissuineq qanoq siuarsimatigaa?
- e) Citronenfjordenimi piginnittut IBA-mik isumaqatigiinniarfigineqalereerpat?

12.11 Konto pingaarneq 64.13.25 Suliffissaaleqisunut immikkut ittumik iliuseqarneq

Apeqqut b) pillugu. Iliuutsit aallartinneqarsimasut pillugit kisitsisitigut paasissutissat pissarsiarineqarnissaat naatsorsuutigineqarpa?

Taamaangippat suliniutit aallartinneqartut qanoq aammalu iluatsitsinermut uuttuutissat suut atorlugit naliliiffiginarneqarpat?

14.1 Konto pingaarneq 70.01.07 Sanaartornermi oqartussaassuseq

Najukkani sanaartornermik kommunit nakkutilliinerisa annertussusiat pitsaassusiallu Naalakkersuisunit naammagisimaarneqarpa?

14.2 Konto pingaarneq 72.02.03 Boligstøtte pillugu aqutsinermut pilersaarusiornermullu aningaasartuutit

10 % Naalakkersuisunit qanoq pissarsiaaraat?

14.8 Konto pingaarneq 72.20.10 Usinik assartuineq

Piffissami pisariillisaaffusutut taaneqartumi (2008-mili) RAL-imi akissarsiat qanoq ineriartorfiusimappat?

15.1. Siunertamut konto 73.94 Nukissiorfiit

Maanna akeqartitseriaatsimik iluarsaaqqinnerup atuutilersinneqarnissaanut pilersaarut ataatsimiititaliamit aallarniutigalugu qinnutigineqarpoq. Tamatuma saniatigut apeqqutit matuma kingulianiittut Naalakkersuisunit akineqarnissaat ataatsimiititaliamit qinnutigineqarpoq.

- a) Nukissiorfinni pisortatut atorfik qaqugu inuttaleqqinneqalersaarnersoq aammalu suliammut tassunga suliffeqarfik sulisussarsiniartarnermik suliaqartartoq atorneqalersaarnersoq paasissutissiissutigineqassasoq kissaatigineqarpoq.
- b) Ataatsimiititaliap paasinninnera malillugu EU-mut isumaqatigiissutip kingunerisaanik Namminersorlutik Oqartussat suliffeqarfiutiminnik nammineertitanik misissuisaqaq. Isumaqatigiissut siunissami Nukissiorfinnut qanoq kinguneqarsinnaanersoq pillugu naliliissummik Naalakkersuisut maannangaq saqqummiussisinnaappat?

15.8 Konto pingaarneq 77.05.01 Eqqakkanut tunngasut

Apeqqut a)-mut.

Apeqqutit affaat eqqagassalerinermut pilersaarutip piviusunngortinnissaanut tunngasut akineqarsimanngitsut ataatsimiititaliamit oqaatigineqassaaq. Taamaattumik matuma akineqarnissaa ataatsimiititaliamit kissaatigineqarpoq; Eqqagassalerinermut pilersaarutip Naalakkersuisunit piviusunngortinniarnearnera sumut killippa ?

Apeqqut b)-mut.

Dioxinimik annikillisaanermut iliuusissatut pilersaarusiariilersaakkamut nassuiaatip nassiunneqarnissaa ataatsimiititaliamit kissaatigineqarpoq, tassani iliuusissatut pilersaarusiariilersaakkami tunaartarisassat piffissalersuutit aamma nassuiaatigineqartariaqarput.

16.15 Konto pingaarneq 89.72.11 Nammineq inissianik tapiissutitalimmik sanaartorneq

Erniat maannatut inissimatillugit ineqarnermut taarsigassarsiarisat allanngortinneqarnissaat iluanaarutissartaqartoq ataatsimiititaliamit ilisimaneqarpoq. Inissiaatillip taarsigassarsiami ernialersuutitaqarnatillu akilersuutitaqannngitsut taarsigassarsianut ernialersugaasunut masakkorpiaq allanngortitsinissaanut pissutissaqarsorinangilaq. Pisuni amerlanerpaani taarsigassarsiat ukiut 15-it qaangiunneranni utertinneqartussanngorpata tamatumalu peqatigiisaanik ernialersugaalerpata apeqqut aatsaat pinngorumaartoq ilimagineqartariaqarpoq.

Ataatsimiititaliap apeqqutaa ima paasineqassaaq; Naalakkersuisut suliaasaqarfimmi ineqarnermut tunngasutigut ungasissumut isigisumik anguniakkaminnik saqqummiussinissaat qinnutigineqartoq. Inissianik piginnittut arlalissuit, taarsigassarsiat ernialersuutitaqannngitsut naanerini, taarsigassarsiaminnik allanngortitsisinnaanngitsut imaluunniit erniat annertuumik qaffassimanerat pissutigalugu akilersinnaasaminnik nutaanik taarsigassarsisinnaanngitsut, taamaattumillu illuumminnik pinngitsaaliissummik akitsorterussisariaqartut paasinarsissa-

galuarpat inissianik niuerutiginninnerup siunissami ajalusoornissaa pinngitsoortinniarlugu qanoq iliuuseqartoqalersaarpa?

Tamanna pillugu ersarissumik paatsuugassaamngitsumillu nassuiaateqarnissaq ataatsimiititaliamit naatsorsuutigineqarpoq.

16.16 Konto pingaarneq 89.72.12 Inissialiassat taartissanillu inissialiortiterneq


Apeqqut h)-mut akissuteqarnissaq.

Kalaallit Nunaanni illoqarfinni anginerne tallimani piffissaq utaqqiffiusartooq pillugu skemanngorlugu takussutissiaq nassiunneqassasoq ataatsimiititaliamit Naalakkersuisunut qinnutigineqarpoq.

Kiisalu Inatsisartut ataatsimiititaliaasa allat marluk apeqqutaat Naalakkersuisunit akisasanngorlugit ilanngussaq A-tut B-tullu ilanngullugit nassiunneqarput. Eqqissisimatitsinermut Avatangiisinullu Ataatsimiititaliaq pingasunik apeqquteqarpoq. Sanaartornermut Ataatsimiititaliaq aningaasanut inatsimmi kontonut pingaarnernut arfineq marlunnut oqaaseqateqarpoq, ilaatigullu maluginiaaqqullugu Sanaartugassanut Iluarsagassanullu Aningaasateqarfik pillugu 2013-imut ukiumoortumut nassuiaat sulitigineqangimmat.

Ataatsimiititaliat allagaat akissuteqarfigeqqullugit oqaaseqarfigeqqullugillu Naalakkersuisut qinnuigineqarput. Apeqqutinut siuliani allassimasunut Naalakkersuisut akissutaat 4. maj 2015 nallertinnagu kalaallisut danskisullu nassiateqquneqarput assilinerallu qarasaasiakkut uunga nassiateqquneqarluni: saam@ina.gl

Inussiarnersumik inuulluqqusillunga



Jens Immanuelson
Ataatsimiititaliap siulittaasua



INATISARTUT

Ilanngussaq Bilag

A

Aningaasaqarnermut Akileraartarnermullu
ataatsimiititaliaq
Siulittaasoq Jens Immanuelson
Postbox 1060
3900 Nuuk

Ulloq: 30.03.2015
J.nr.: 01.37.02.29-00005

Aningaasaqarnermut Akileraartarnermullu ataatsimiititaliap AIS 2015-imik misissuineranut Eqqissimatitsinerumut Avatangiisinullu ataatsimiititaliap ilassutai

AIS 2015-imut Ataatsimiititaliaq susassaartoq ima oqaaseqaatissaqarlunilu
ilassutissaqarpoq.


Ataatsimiititaliaq tamarmiusoq isumaqarpoq mingutsitsissutaannginnerusussamik
sakkortuumik tunngaveqarluarlunilu naalakkersuinikkut ingerlatsineq inuiaqatigiinnut
iluqaqtissaasoq ersarisoq. Tamanna avatangiisinut iluaqutaavoq, suliffissanik
pilersitsiffiulluni kiisalu inuit uumasullu inuuniarnerinut tunngaviusut attatiinnarneqassallutik
pigiinnarneqarlutillu.

AIS 2015-ip suliarineqarneranut atatillugu pineqartut uku malersorneqassasut
Eqqissimatitsinerumut Avatangiisinullu ataatsimiititaliap kaammattuutigerusuppa:

1. Uuliaarluernermi akiuinerumut naammattunik aningaasalliisoqarpa?
Taamaattoqanngippat naggataagut inuiaqatigiinnut annertunerungaaqisumik
aningaasartuuteqarnermik kinguneqarsinnaavoq. Tassunga atatillugu
uuliaarluernermik akiuinissamut atatillugu Naalakkersuisut qanoq
takorluugaqarnerisut Ataatsimiititaliap paaserusuppa. Uulla pillugu
upalungaarsimanerumut aningaasanut siuliani inatsimmi 600.000 kr.-t missaani
aningaasalliissutigineqarput, taakkulu umiarsualiviit eqqaanni aamma sinerissap
qanittuani uuliamik mingutsitsinerup illiuseqarfiginissaannut salliutillugit
atorneqarniarput.
2. Immiaaqqat il.il puui pillugit nalunaarutip nutaap suliarineqarnera sumut killippa?
Suliffinnut annaasanut aamma atortuutitut nutaanut aningaasalersuinerit
nalunaarutip nutaap inuiaqatigiinnut qanoq akeqassanerinut kisitsisinik nutaanik
peqarpa?

3. Konto 50.06.50 "Aalisarnermut aningaasaliissutinut immikkoortitat" pillugit 2015-imut aningaasaliisoqarsimangilaq. Pissutsit marlut tunngavigalugit tamanna Ataatsimiititaliamut ernumanartoqartinneqarpoq. Siullermik avatangiisinut iluaqutaasumik angallatit atorsinnaajunnaartut isaternissaat Ataatsimiititaliap soqutigisaraa. Aappaattut aalisagaatigut annertunerusumik paasisaqarfigiumallugit aalisarnermik misileraanerit nutaaliornullu siuarsarneqarnissaat Ataatsimiititaliap soqutigisaraa. Taakku pillugit Naalakkersuisut qanoq isumaliutersuuteqarpat?

Inussiarnersumik inuulluaqqusillunga



Michael Rosing,
Ataatsimiititaliami siulittaasoq



Ilanngussaq Bilag

8

Aningaasaqarnermut akileraartarnermullu ataatsimiititaliamut

Ulloq: 25. marts 2015
J.nr.: 01.31.11-00015

AIS 2015-II pillugu Sanaartornermut ataatsimiititaliamut attuumassutilinnut Aningaasaqarnermut ataatsimiititaliap tusarniaanera

Sanaartornermut ataatsimiititaliaq sinnerlugu AIS 2015 pillugu Sanaartornermut ataatsimiititaliamut attuumassutilinnut tusarniaanermit akissuteqarnissamut periarfissinneqaratta qujamassutorujussuuvunga. Ataatsimiititaliat attuumassutilit AIS pillugu Aningaasaqarnermut ataatsimiititaliap suliaqarnerani ilapittuuteqarnissamut taamaallilutik periarfissinneqarnerat pingaaruteqarlunilu tikilluaqqunarpoq, taamaaliornikkummi Nunatta Aningaasiviata aningaasaataanik Inatsisartut ataatsimut pingaarnersiunerat annertunerpaamik ersersinneqarsinnaammat. Sanaartornermut tunngasut AIS-imi initoqaat, taakkulu pisarnertut eqqumaffigineqartaqaat. Taamaattumik Sanaartornermut ataatsimiititaliap AIS-imut akissuteqarnissani pingaarteqaa.

Sanaartornermut ataatsimiititaliap oqaaseqaatit uku Aningaasaqarnermut ataatsimiititaliamut nassiuppai, Aningaasaqarnermut ataatsimiititaliap ulluni tulluuttuni isumasiunermit apeqqutaanut Aningaasaqarnermut ataatsimiititaliap oqaaseqaatit tamakku ilanngussinnaaniaasammagit, aamma/imal. AIS pillugu Sanaartornermut ataatsimiititaliap isumallutissiissutissaannut ilanngunneqarsinnaaniassammata. Tamakku pillugit Sanaartornermut ataatsimiititaliap paasisaqarnissani qilanaaraa.

Sanaartornermut ataatsimiititaliap ataatsimut isjalugu AIS-imut annikitsuinnarnik oqaaseqaatissaqarpoq, Ataatsimiititaliammi iluarisimaarlugu paasivaa Aningaasaqarnermut ataatsimiititaliap AIS-15-II pillugu apeqqutimigut oqaaseqaatimigullu peqqissaarluinnarsimasoq, pisortallu sanaartugassaataannut tunngassuteqartutigit apeqqutinik naleqquttunik arlalissuarnik apeqquteqarsimasoq.

Sanaartornermut ataatsimiititaliap suliassaqarfiit siunertaqarfiillu Aningaasaqarnermut ataatsimiititaliap Sanaartornermut ataatsimiititaliamut immikkut naleqqussorisimasai allakkatigit matumuuna aallaavigivai, Ataatsimiititaliali nalilernikuuaa suliassaqarfiit 80-imiit 89-imut tamarmik Sanaartornermut ataatsimiititaliamut attuumassuteqartuusut, pisortanimmi sanaartortitsinerit tamarmik Sanaartornermut ataatsimiititaliap susassaqarfigimmagit.

Konto pingaarneq 70.01.04 Sanaartornermi agutsineq suliniutinullu aningaasartuutit

Kontomi pingaarnermi aningaasaliissutit suliassaqaarfinni 80-89-imi oqaasertallussanut nassuiaammut nr. 7-imut annertunerusumik attuumassuteqarput. Oqaasertallussanut nassuiaammi takuneqarsinnaavoq, kontomi pingaarnermi tassani 2015-imi katillugit 7,8 mio. kr.-inik sanaartugassanik ataasiakkaanik suliassap akiata 2,5 procentia angullugu akiligassiinissamut Naalakkersuisut piginnaatinineqartut. Kontomi pingaarnermi tassani aningaasaliissutinut tunngavigisani takuneqarsinnaavoq, aningaasaliissutitigit ukiumoortumik sulisunut 17-inut, ukiumi ataatsimi 14-inik qaffariaataasumik pilersaarusiorterup ataatsimut isigalugu sukaterneqarnissaanut aningaasartuuteqartoqarsinnaasoq, aammali Test Labip ingerlanneqarneranut aningaasartuuteqartoqarsinnaasoq, Test Lab fassaavoq Namminersorlutik Oqartussat sanaartornermut immikkoortotaqarfiata sanatitsisutut, Namminersorlutik Oqartussat siunnersuisartuisa minnerunngitsumillu Namminersorlutik Oqartussat sinnerlugit sanaartortussat ineriartortitsiniarlutik naapittarfiat toqqammaviillu. Ataatsimiititaliaq isumaqarluinnarpoq, taamaaliornikkut piviusut tunngavigalugit sanaartornermut tunngassuteqartutigit agutsinermut tunngasunut aningaasanik nuussisoqartoq. Tamanna akimut ersittutut pissuseqanngilaq, aningaasallu tunniunneqartarneranni eqqortumik periutsitut taaneqartariaqarani.

Tamatuma saniatigit Ataatsimiititaliap paasivaa, kontomi pingaarnermi 9,83 mio. kr.-t isertifassatut missingersuutigineqartut, oqaasertallussatulli nassuiaatit malillugit 7,8 mio. kr.-t taamaallaat annertunerpaamik akiligassiissutigineqarsinnaallutik. Isertifassat taama nikingassuteqarnerat nassuiarneqarsinnaanngitsutut pissuseqarpoq, itisilerneqartariaqarlunilu.

Sanaartornermut ataatsimiititaliap paasinninnera malillugu 2014-imut aningaasanut inatsimmut sanilliullugu sulsunik atuinerup malunnaatillimmik qaffakkiartornera, INI Byggeteknik A/S-imit siusinnerusukkut sulsuisa nuunneqarnerinik pissuteqarsinnaavoq. Ataatsimiititaliap paasinninnera malillugu, nuussineq – allaat illoqarfinni pineqartumi pisartog – immikkoortortap sulsuisa akornanni annertoqisumik taarseraannermik kinguneqarsimavoq. Ajornartorsiut allakkami uani kingusinnerusukkut Ataatsimiititaliap uterfigissavaa.

Konto pingaarneq 72.20.05 Ilaasunik angallassinermut tapiissutit

Sanaartornermut tunngasutigit kiffartuussinermut aningaasaliissutissanut atatillugu Naalakkersuisut isumaqatigiissuteqarsinnaanerat Aningaasaqarnermut ataatsimiititaliamit 2015-imi akuerineqartussaammat Sanaartornermut ataatsimiititaliap ajunngitsutut isigaa. Sanaartornermut ataatsimiititaliap qinnutigaa, tamanna pillugu aningaasaliissuteqarnissamut suliaq taamanikkornissaanut Naalakkersuisunit nassiunneqarpat, Sanaartornermut ataatsimiititaliap Aningaasaqarnermut ataatsimiititaliamit tusarnianeqaqqaassasoq.

Sanaartornermut ataatsimiititaliaq tamatuma saniatigit isumaqarpoq, mittarfinnik nutaanik sanaartornissamut Naalakkersuisut pilersaarutaannut angallassinermi kiffartuussinermut isumaqatigiissutillassat ataqatigiissinnissaat aamma eqqarsaatigineqartariaqartoq. Tassunga atatillugu angallannermut tunngasutigit Sanaartornermut ataatsimiititaliap aalajangiiffigisassatut siunnersuutai marlut siusinnerusukkut saqqummiussimasai Sanaartornermut ataatsimiititaliap malugeqqussavai. Sanaartornermut ataatsimiititaliap

maanna atuuttup aalajangiiffigisassatut siunnersuutit taakku marlut isummerfigisimangilai, ataatsimulli isigalugu isumaqarluni, siunnersuutitut marluusunut tunuliaqutaasut, tassa nunami namminermit ilaasunik timmisartuussinerit pisariillissarnissaat akikillissarnissaallu, tungaviatigut suli tapersersorneqartariaqartut, taamaattumillu siunnersuutit tungaviatigut isummat maanna Naalakkersuisuusut mittarfiiit tungaasigut misissuinerannut ilaatinneqartariaqartut.

Konto pingaarneq 72.20.10 Usinik assartuineq

2011-imi siunnersortit avataaneersut atorneqarnerisigut Royal Arctic Line-mi (RAL-imi) ukiumut pisariillissaanermut iluaqutissat 30 mio. kr.-nik nalillit nassaarineqarsimanerat Ataatsimiititaliap soqutiginaqisut pingaaruteqartutullu isigaa. Pisariillissaanermut iluaqutissat atuutilersimangitsuuppata, RAL-ip akigifitaasa ukiuni kingullerni qaaffavigineqarnerusariaqarsimanerat naatsorsuutigineqarsinnaavoq, pissusiviusutigummi taamaangilaq. Misissuineq soorunami malitseqartinneqartariaqarpoq, Aningaasaqarnermummi ataatsimiititaliaq Naalakkersuisunut apeqqummini taama allappoq. Ataatsimulli isigalugu Nunatta Aningaasiviata unammilligassai pissutigalugit tamanna itigartikkuminaatsutut isikkoqarpoq, pilersuinerummi tungassuteqartuni assingusuni pisortat ingerlatsiviutitsinni kisermaassiffiusuni angisuuni taamaaqataanik siunnersortinit *avataaneersunit* sukumiisumik misissuutitsisoqartariaqarpoq, matumanilu immikkut Tele Greenland pineqarpoq, taannami malunnaqisumik ukiut tamaasa sinneqartooruteqartarpoq. Tamanna pisinnaavoq attaveqatiginnikkut akikillissaanissaq siunertaralugu, aamma internetip nunap immikkoortulni tamani ingammillu ilinniartitaanermit siuarsarnissaa siunertaralugu ingerlatseqatigiffiup akissaaajaatigut sulisoqarnikkullu aaqqissuussinerata isornartorsiorpalaartumik nalilersorneratigut.

Sullasaqarfik 80-89 Sanaartornermut tunngasut

Ukiuni kingullerni pisortat sanaartugassatigut sinaakktissaat, ukiut ataasiakkaarlugit suliassaqarfinni 80-89-miittut Aningaasanut inatsisini ataatsimut pisortat aningaasaliissutaatut paasineqartariaqartut, takussutissiami tulluuttumi takuneqarsinnaapput:

Ukioq aningaasaliiffiusoq ¹	Sanaartugassanut sinaakktissat AI/AIS (mio. kr.)	Ilassutitut aningaasaliissutit IA-inatsimmiittut (mio. kr.)	Sanaartornermut sinaakktissat AI+IA (mio. kr.)
AIS15-II	607,7	-	-
AIS15-I	679,0	-	-
AI14	778,9	131,4	910,3
AI13	779,4	-124,9 ²	654,5

¹ Malugeqqusaq: Aningaasanut inatsit avaqqullugu pisortat aningaasalersuutigisinnaasai takussutissiami naatsorsuutigineqanngillat, assersuutigalugu aktiaatileqatigliiffinneersut.

AI12	946,4	78,2	1.024,6
AI11	937,4	174,0	1.111,4
AI 10	757,6	1,5	759,1

Takussutissiami qulaaniittumi pissutsit arlallit aallaaviusinnaapput:

- a. 2012-imilli sanaartornermut sinaakkutissatut missingersuutit *appariartuaartutut* pissuseqarput. Piffissamilli tamatumani pisortanit aningaasaliissutit ataatsimut isigalugu *qaffakkiartuaarsimapput*. Allatut oqaatigalugu pisortanit aningaasartuutit sulii amerllartuinnartut ataavartumik ingerlatsineranut aningaasartuutit atorneqartarput, annikinnerusumillu sanaartornermut aningaasalersuineranut atorneqartarlutik, sanaartornermummi aningaasalersuinerit eqqortumik aningaasalersuiffissaqartillugu inuiaqatigiit aningaasaqarnerannut ajunngitsumik *pilersitsisinnaapput*.
- b. Sanaartornermut sinaakkutissat ataatsimut isigalugit nikerartorujussuusimapput. Ukiumiit ukiumut nikerarnerit 150 mio. kr.-t tungaanoortuusarput. Taama annertutigisumik nikerarnerit sanaartornermik suliaqartunut arlaannaatigulluunniit iluaqutaagunangilaq, sanaartornermimmi suliaqartut sulisorisanik akuttunngitsumik soraarsitsisarluutillu sulilersitsisariaqartarput. Taamaalilluni sanaartornermik suliaqartuusut sulisuminnik aalajangersimasunik tatiginartunillu sulisoqarnissaminnut periarfissaat killilerneqartarpoq, taakkumi inaagaqarsinnaanermik pitsaassutsimillu qaffaseqisumik isumannaarinnissinnaapput, taamaaliornikkullu sannarlutat killilerneqarsinnaalutik.
- c. Ukiup aningaasaliiffiusup ingerlanerani sanaartornermut ataatsimut sinaakkusiaasut tulluanngivissumik amerlaqisut ilassutitut aningaasaliissutinit pisarput. Tamanna missingersuusiortarnermut atatillugu tulluartausorinanginnerata saniatigut, aningaasanullu inatsisip Inatsisartut ataatsimut tullerliaarineranut tunngayigisamut tulluartaunngimmat, tamanna Aningaasaqarnermut ataatsimiititaliamut attuumassuteqarmat, taamatut missingersuusiortarnermi pissutsit naammaginngitsut soorlu qulaani imm. b-mi taaneqartut itut ersersinneqartarput.

Siuliani inernillussaagallartut tunngavigalugit Aningaasaqarnermut ataatsimiititaliaq Naalakkersuisunik oqaloqateqassasoq Sanaartornermut ataatsimiititaliap kaammattussavaa. Nuna tamakkerlugu sanaartornermut kissaatigisat pisariaqartullu annertoqisut imaallallaannaq suussusersineqarsinnaapput, tamakkulu sanaartornermut kissaatigisat piviusunngortissinnaanannut ataatsimut isigalugu pisortanit sanaartornermut sinaakkutissat ukiumiit ukiumut allaqussassaannngitsumik killiliisussaassapput, ingerlatsineranut aningaasaliissutinit minnerunngitsumillu tapiissutitut aningaasaliissutinit aningaasartuutit qaffakkiartornerat pissutigalugu.

² Nukissiorfinnut sanaartugassanut taarsigassarsjat 100 mio. kr.-nik ikilineqarsimanerat aningaasartaani immikkut takuneqarsinnaavoq, taakkulu isertitatut inissinneqarput. Aningaasat aktiaatilleqatigiiffimmu nutaamut Nuummi Atlantikup ikaarneranut nutaamik umiarsualivillornermut nunneqarput.

Tamatuma saniatigut Sanaartornermut ataatsimiititaliap ilsimavaa, sanaartornermik suliaqartut aamma suliaqarfiit kattuffiisa pisortanit sanaartukkat pillugit ukiuni arlaqalersuni sinaakkutissanik aalajannerusunik kissaateqartarnerat, qulaanilu kisitsit taamatut isummersornernut tapersiinermik takutitsisutut isumaqarnartoq.

Konto pingaarneq 83.30.13 Nuna tamakkerlugu paaginniffiit

Kontomi pingaarnermi tassani nuna tamakkerlugu innarluutillit sungiusartarfiannik pilersitsinissamut ukiumut aningaasanut inatsimmut ukiunullu missingersuusiorffiusunut agguataarlugit katillugit 51,2 mio. kr.-t aningaasaliissutigineqassasut immikkut siunnersuutigineqarpoq (Suliasaq nr. 080.40.054).

Suliasamat allaaserisami takuneqarsinnaavoq suliffeqarfimmut tassunga ilaassasoq IPIS, sungiusaavik ikiuutilersuisarfillu. Takuneqarsinnaavortaaq suliffeqarfik Sisimiuniissasoq. Taamatut inissinnissaanut tunngaviusumut suliasaq pillugu ima allaaserisartaqarpoq: *"Aammattaaq sullissiveqarfiup Sisimiunut inissinneqarnissaa aalajangiunneqarsimavoq, aningaasaliissutit piginnaasanillu ineriartortitsinerup nuna tamakkerlugu siammarterneqarnissaat inuiaqatigiinnut iluaqutaasussatut isigineqarmat".*

Pissutsit pisariaqartullu nalinginnaasut isiginiarlugit sanaartornermut pisortanit aningaasaliissutit nuna tamakkerlugu siaruaanneqartariaqarnerat Sanaartornermut ataatsimiititaliap tunngaviatigut isumaqatigaa. Taamaattorli nuna tamakkerlugu innarluutilinnik sullissiviup Sisimiuni inissinneqarnissaanik aalajangiineq imaallallaannaq paasinangilaq. Taamaallilluni IPIS-ip Sisimiunut nuunnissaani suliasamat tamatuma akitsorsaataanissaa avaqqunneqarsinnaanngilaq. Tamatuma saniatigut assingusumik nuussisarnerit misilittagaqarfiupput; sulisut amerlaqisut nutsernermut ataiillugu suliffimminnit soraartarnerput, assersuutissaavorlu Nuka A/S-ip Nuummit Maniitsumut nuunneqarnera imaluunniit Polar Oil A/S-ip Maniitsumit Sisimiunut nuunneqarnera. Ingerlatsivinnut ajoqutaaqisumik annaasaqaataasumillu ilsimasanik annaasaqarneq annertoqisoq nutsernermi marluusuni pisimavoq, taakkulu atuisunit akileraartartunillu matussuserneqartariaqarsimapput. Tamatuma saniatigut pissusissamisoorpasippoq innarluutilinnik sullissiviup Nuummi nuna tamakkerlugu napparsimmaviup qanittuani inissinneqarnissaa iluaqutaassasoq, immikkummi ilsimasallit, assersuutigalugu fysio-aamma ergoterapeutit, nakorsat immikkut ilinniarsimasut, tassaniinnissaat naatsorsuutigisariaqarmat – minnerunngitsumillu napparsimasut/sullitat, taakkumi pineqarnerat naatsorsuutigisariaqarmat.

Taamaattumik Sanaartornermut ataatsimiititaliap Aningaasaqarnermut ataatsimiititaliap qaammattussavaa, suliasap tamatuma inissinneqarneratalu sukumiilluinnartumik isiginiarinnisaanut, inissiinerullu kingunerisaanik annertunerusumik akissaajaateqarnissamik kinguneqarnissaa, minnerunngitsumillu inissiinerup kingunerisaanik innarluutilinnut ajoqutaasinnaasut eqqarsaatigalugit. Oqaatigineqartutut pisortanit sanaartornermut aningaasalersuinerit nunami siammarneqarnissaat Sanaartornermut ataatsimiititaliap tunngaviatigut tapersersorpaa, kisiannili innarluutilinnut ajoqutaanissaanik kinguneqassappat, imal. qitiusumik sulianut soorlu innarluutilinnik sanngiitsunillu ikiuinermut annertuumik ilsimasanik annaasaqarnermik kinguneqassagaluarpat taamaaliorqartariaqarani.

Sanaartornermut aningaasalersuinerit nunami siammarnissaannik siunertaq attatiinnarneqassappat, Sanaartornermut ataatsimiititaliap taarsiullugu kaammattuutigissavaa ilinniartitaanermit, ilinniartut ineqarfiinut attaveqarnermilu suliniutinut aningaasaqarnikkut imminut akilersinnaasunut, soorlu aqqusiniliornernut, pisortat inissiaataasa oqorsaasersornerinut kiisalu imermik kissamillu uuttuutit atulersinneqarnissaannut, aningaasalersuisoqassasoq.

Konto pingaarneq 84.40.10 Kommunini atuarfiit

Sanaartornermut ataatsimiititaliap iluarisimaarlugu paasivaa, Aningaasaqarnermut ataatsimiititaliap aammaarluni kaammattuut nr. 3 pingaaruteqaqisoq uparuaateqarfignaa, tassaasoq kommunit atuarfiisa illutaasa aserfallatsaalineqarnissaannut kaammattuut ukiumi kingullermi Aningaasaqarnermut ataatsimiititaliamit saqqummiunneqartoq. Qularutissaanngilaq ajornartorsiut pingaaruteqaqisoq Aningaasaqarnermut ataatsimiititaliamit uparuarneqarmat, pineqartummi suliareqarneratut tulluanngilluinnarpoq kommunit aningaasaqarnikkut kaammattorneqartarmata, atuarfiilli illutaat aserfallatsiinnarlugit, kommuninimmi ataasiakkaanit immikkut isiginiassagaanni atuarfiit illutaasa aserfallannissaat akilersinnaanerusarmat, taamaaliornermimi pissusiviusutigut piffissanngortarpoq nutarterinerit annertuut nutaamilluunniit sanaartornerit Naalakkersuisunit akilerneqarnissaat itigartinneqarsinnaajunnaartarami. Sanaartornermut ataatsimiititaliap iisimavaa, sanaartornermut aningaasartuutit %-iisa ilaannik kommuninit akilerneqartalernissaat isumaliutaanikuusooq, assersuutigalugu atuarfiup Namminersorlutik Oqartussat akilligaata ukiumi tulliuuttuni illuutit nutaat aserfallatsaalinissaannut kommunit pisussaaffilerisigut. Qularnanngilluinnartumik tamanna suli isumatsialaavoq, kisiannilli aaqqilissutissat allat aamma periarfissaapput, kaammattuinerullu tamatuma pingaarutillip piviusunngortinnissaanut Aningaasaqarnermut ataatsimiititaliap suliangi nangiissagaa kaammattuutigineqarpoq

Konto pingaarneq 84.40.16 Kultureqarnermut sanaartukkat

Sanaartugassanut iluarsagassanullu Aningaasaateqarfimmi aningaasaliissutit piviusorsiorlumik tunngaveqarnissaannik isumannaarinissamut pisariaqartitsineq pillugu ukioq kingulleq Aningaasaqarnermut ataatsimiititaliap saqqummiussaa kaammattuut nr. 4 Aningaasaqarnermut ataatsimiititaliap uparuaatigeqqikkaa Sanaartornermut ataatsimiititaliap naammagisimaarlugu paasivaa. Sanaartugassanut iluarsagassanullu Aningaasaateqarfimmi aningaasaliissutit suliniutinut aalajangersimasunut pituttugaapput, taamaattumillu aningaasat allanut imaluunniit suliniutinut allanut nuuinnarneqarsinnaanngillat, kisiannilli pingaaruteqarpoq sanaartugassatut suliniutit Inatsisartunit aningaasaliiffigineqartut siusarnissaat pilersaarusiornissaallu, taamaalillutik aningaasaliissutit atorneqalissammata, sanaartornerlu ataavartumik ingerlanneqarluni, silamilu sanaartugassanut aputeqannginnera qerinannginnaralu pitsaanerpaamik atorluarneqarluni. Anguniagaq tamanna ullumimut anguneqarsimanngitsooq malunnarpoq. Taamaattumik Sanaartornermut ataatsimiititaliap kaammattuutip tamatuma attatiinnarnissaannik Aningaasaqarnermut ataatsimiititaliamut kaammattuuteqarpoq.

Naggasiullugu Sanaartornermut ataatsimiititaliap Aningaasaqarnermut ataatsimiititaliamut malugeqquaa, Sanaartugassanut iluarsagassanullu Aningaasaateqarfik pillugu 2013-imut ukiumoortumik nassuiaammik suli tigusaqartoqarsimanngimmat. Tassunga atatillugu Aningaasaqarnermut ataatsimiititaliap kaammattorneqarpoq, Naalakkersuisut peqatigalugit Sanaartugassanut iluarsagassanullu Aningaasaateqarfik mississorneqassasoq, suliniutit suli naléqquttuunersut imaluunniit atorunnaarsinneqassanersut misissorneqarnissaat .

siunertaralugu. Tassunga atatillugu figussaasumik nalillerneqassaaq, suliniutit kommunit aningaasaleeqataanissaannik tunngaveqartut ilumut ingerlanneqarsinnaanersut.

Inussiarnersumik inuulluaqqusillunga



Anders Olsen

Sanaartorneqmut ataatsimiititalami siulittaasoq